

開放文學－歷代筆記－夷堅丙志 第一卷

序 始予萃夷堅二書·顧以鳩異崇怪·本無意於纂述人事·及稱人之惡也·然得於容易·或急於滿卷秩成編·故頗違初心·如甲志中人為飛禽·乙志中建昌黃氏冤馮當可江毛心事·皆大不然·其究乃至於誣善·又董氏俠婦人事·亦不盡如所說·蓋以告者過·或予聽焉不審·為疎然以慚·既刪削是正·而冗部所儲·可為第三書者·又已褻穢·懲前之過·止不欲為·然習氣所溺·欲罷不能·而好事君子復縱與之·輒私自怨曰·但談鬼神之事足矣·毋庸及其他·於是取為丙志·亦二十卷·凡二百六十七事雲·幹道七年五月十八日·洪邁景盧敘·

九聖奇鬼

永嘉薛季宣·字士隆·左司郎中徽言之子也·隆興二年秋·比鄰沈氏母病·宣遣子法·與何氏二甥問之·其家方命巫沈安之·治鬼·法與二甥皆見神將著戎服·長數寸·見於茶托上·飲食言語·與人不殊·得沈氏亡妾·挾與偕去·追沈母之魂·頃刻而至·形如生·身化為流光·入母頂·疾為稍間·法歸·誇語薛族·神其事·時從女之夫家·苦魑怪·女積抱心恙·邀安之視之·執二魑焉·狀類猴而手足不具·神將曰·其三遠遁·請得追跡·俄甲士數百·建旗來前·旗章畫三辰八卦·舒光燦然·器械悉具·弩梁施八龍首·機藏柄中·觸一機則八龍張吻受箭·激而發之·躍如也·無何縛三魑至·又執二人·一青巾·一髻髻·皆木葉被體·命置獄考竟·地獄百毒·湯鑊剉確·隨索隨見·鬼形糜碎·死而復甦屢矣·訖不承·安之呼別將藍面跨馬者訊治·叱左右考鞫·親折鬼四支·投於空而承以槩·大抵不能過前酷·而鬼屈服受辭·具言乃宅旁樹·剖其腹得一卷書·曰·此女魂也·投之於口·亦入其頂中·是夕小愈·明日·神將言魑黨三輩·挾大力·不肯就逮·方以兵見拒·請擊之·遽發卒數萬·且召會城隍五嶽兵·偵候絡繹·既而告敗·或有為所剽削·竄而歸者·曰·通郡郭為戰場·我軍巷鬥·皆不利·又遣鐵幟將率十倍之眾以往·亦敗·安之色不怡·燒符追玉筭三雷院兵為援·會日暮不決·後二日·始有執旗來獻捷者·如世間捷旗·而後加謹報二字·得一酋·冕服而朱纓械之·大青鬼稱為雷部·憑空立·雲氣復冒其體·鼓於雲間·霆聲再震·金蛇長數丈·乘電光入幽囿中·法及何甥謂與常雷電亡異·而餘人不覺·其夜神將曰·聞遠方神物為諸鬼地·且將劫吾獄·命檻車錮囚於內·羅甲卒衛守·安之焚楮數萬以犒士·既焚·則已班給·人才得七錢·數日·女疾如故·安之復領神將來曰·女魂又為鬼所奪矣·於是解發禹步·仗劍呵祝·每俘獲必囚之·何甥自是無所睹·法見神將形漸長大如人·揖季宣就席·與論鬼神之事·曰·非是真有·原皆起於人心·人心存而有之·無無有有·蓋無所致詰·又語法問學·曰·當讀睿智顯謨兩先生文集·告以世無此書·曰·書已為秦政焚滅矣·承烈先生者·顯謨先生子也·其意蓋指帝堯及文王武王·又曰·人無信不立·果知自信·則先王之道·可由學而致·宣外甥久病瘡·女兄睹此事敬異之·神即傍顧曰·聞親戚間有鬼瘡·可並案也·安之不許·明日·女兄來假室治甥病·神降者三人·其一類左司公·呼宣小字曰·虎兒·吾汝父也·今為天上明威王·位在岳飛右·吾兄吏部嘉言待制弼姻家孫秘丞端朝分將五雷兵·亦為三明·當與孫公過汝·宜治具以待·凡捕得七鬼·悉係獄·迨夜下漏·呼囚大略如人世·明日·神將來甚眾·自此不復離堂戶·或稱南北斗真武岳帝·灌口神君·成湯·高宗·伊尹·周公·陳搏·司馬溫公者·又言堯舜在天為左右相·文王典樞密·孔子居翰苑·其語多野鄙可笑·閻羅王續至·望神將再拜謁·飭陰吏索薛氏亡者·得男女十有六人·宣父母及外舅孫公咸在·皆公服帔裳·一家婢僕悉見·席罷·曰·獄事未竟·明當再來·今日饑具殊薄惡·後必加豐·令足以成禮·遂去·獨留兩偏將徼巡·法出·見吏士塞途·所經祠廟·主者迎謁·一走卒還白曰·上天以下元考功·吾王轉飛天大神·王以元帥董督五院矣·五院者·安之所行法也·宣兄寧仲竊怪之·誦言曰·此奇鬼附托·不足復祀·宣曰·鬼神固難知·既稱吾先人·安得不祭·神將稍不懼·為奏誣寧仲等不孝·請於帝減其算·旋得詔報可·意欲以懼宣·明夜十六人復集·自設供張·變堂與為廣庭·幄帟皆錦繡·器用皆金玉·男子貂蟬冕服·婦人褱衣·侍女珠翠·金石備樂·如墳簾祝敵之屬·法所未嘗見·酒既酣·奏妓為潑寒胡曼延龍爵之戲·千詭萬態·聽其音調·若因風自遠而至·伶官致語·多讖未來事·或謂不已·信者皆粗俗·持兩端·自相繆戾·頗覺人議已·左司者哭而言曰·汝謂死而無知可乎·殆有相焚惑者·非汝之過·可繪我與孫公像·並所事神將祠於室·宣曰·大人死為天神·甚善·子孫當蒙福·不宜見怪·以邀非正之享·今其絕影響·勿復來·應曰·諾·詰旦·久未起·妻淑者·秘丞女也·亦疑以為不可復祀·宣未對·所謂左司秘丞者·已泣於床隅·曰·真絕我乎·淑曰·阿舅阿父幸臨臨·何為造兒女子床下·皆大慚·曰·汝言是也·吾即去·遂跨虎以出·淑謂長似吾翁吾父皆正人·必不為此·殆是假其名而竊食者·語竟·即有驅先二人來·曰·此等皆妄也·真飛天王使我捕之·宣叱曰·汝輩魑魅亡狀·又欲以真飛天誑我·拔劍擊之·則復其本質·少焉盡室皆魑·移時乃沒·明日·法誦書堂上·又有啟戶者曰·二魑已伏誅·吾來報子·宣以劍拂其處·血光赫然·它奇形異狀者踵至·皆計窮捨去·其一繫辟於廷·曰·晝日吾無可奈何·夜能苦子耳·及夜徑來逼法·宣抱之於懷·魑將以物置法口·宣掩之·法於手中得藥·投諸地·有聲墮宣指間·瘡即隱起·已又投食器中·淑取食之·無傷也·夜半不去·法困急悶不自持·默誦周易乾卦·似小定·既而復然·淑取真武象掛於傍·法覺如人噴水入身中·冷若冰雪·魑化為光氣·穿牖而滅·精神始寧·薛氏議呼道士行正法·魑歷指其短·惟不及張·彥華偶隨請而至·魑詐稱舊僕陳德華·叱令吐實·曰·我西廟五通九聖也·沈安之所事·皆吾魑屬·此郡人事我謹·唯薛氏不然·故因沈巫以給之·欲害其子·今手足俱露·請從此別·華去之明日·妖復作·攻法益甚·華始命考召·法見神人散發飛空·乘鐵火輪·魑以藥丸迎拒之·人輪皆喪·九聖者·自稱神將·著紗帽楮服·與道士並·步(止) 噴水·略無忌憚·華歸焚章上奏·掃室為獄·置灰焉·明旦闔灰跡·一鬼一婦人就係·獄吏朱衣在傍立·空中鬼反呼正神為賊將·言曰·勿得以戈撻我·我為王邦佐·鐵心石腸人也·汝何能為·趣修我廟乃已·宣不復問·領僕毀其廟·悉斷土偶首·初法夢為群猴昇入穴·青色鬼牽虎斷斷然·於是其像·廟既壞·邦佐方引咎·請於法·宣還家·續○七人至·其一自名蕭邦貢·法呼曰·神將胡不擒此·即有大星出中庭·雲烝其下·三魑扶搖而上·旋致於灰室·其四脫走·火輪石斧·交湧雲際·凡俘鬼二十一·皆斬首·其十五屍·印火文於背·曰山魑不道·天命誅之·其六屍印文·稱古埋伏屍不著墳墓·害及十人者·竿梟其首以徇·是夕啟獄·灰跡從橫凌亂·而繫者才五輩·將上送北鄴·金甲神持黃紙符飭示法·上為列星九·中畫黑殺符·下雲大小鬼神邪道者並誅之·法錄示華·華喜曰·上帝有命矣·質明詣獄問吏·吏白制飭已定·行刑可也·首惡非王邦佐·實蕭文佐·蕭忠彥·李不逮·餘不可勝計·姓名不足問也·甲卒以木驢石砭火印木丸之屬·列廷下·吏具成案律書盈幾·呼軍正案法·一吏捧策書至·曰·已有特旨·無庸以律令從事·先列罪於漆板·易以朱榜·金填之·立大旗·書太清天樞院·下揭牌曰·奉飭某神將行刑·吏以引示法曰·有飭諸魑並其所偶·一切案誅之·五雷判官者進·曰·元惡斃以陰雷·皆三生三死·次十五人支解·餘陰雷擊之·引三魑震於前·酌水灌頂·旋復活·如是三擊乃死·以籃盛屍去·三朱榜標其後·曰九聖·曰山魑·曰五通·罪皆有狀·使徇於廟·相次以驢床釘二男四女及六魑·創者朱帕首·虎文衣·亦各書其罪·一人乃舊婢華奴·以震死而為厲者·一人非命而為木魑者·男強死而行疫者·魑正神而邪行者·詐稱九聖者·竊正神之廟食者·生不守正·死為邪鬼·殺人誤國·無所不至·而蹤跡詭秘如某人者·皆先啖以食·吞以木丸而後斃之·其斃於雷火者·又二十二人·竟刑皆失所在·武吏持天樞院牒致宣曰·山魑之戮·非本院敢違天律·為據臣僚奏請·專飭施行·牒請照會·初郡人事九聖淫祠·久為民患·及是光響訖熄·自沈巫治從女病·以十月七日·迨二十八日乃畢事·首尾逾再旬·彥華所降天人·與沈巫之怪·無以異·弟語音如鐘磬金玉·細若嬰兒·而怪聲則重濁類人云·宣恨其始以輕信召禍·自為文曰·志過·紀本末尤詳·予採取其大概·著諸此·法時方十四五歲·陳舜民

晉江主簿陳舜民·被檄詣福州·未至三驛·已就館·從者皆出外·獨坐於堂·有婦人自東偏房出·著淡黃·衫靚裝甚濟·徘徊堂上·歌新水詞兩闕·舜民知其鬼物·默誦天蓬咒·殊不顧·緩步低唱·其容如初·舜民益疾誦咒·聲漸厲·婦人頽然怒曰·何必

如此·趨入房·乃不見·梁叔子參政說·
貢院鬼

臨安貢院·故多怪物·吏卒往往見之·幹道元年秋試·黃仲秉鈞胡長文元質芮國瑞輝昌禹功永為考試官·國子監胥長柳榮·獨處一室·病疴晝臥·一男子·一婦人·攜手而入·招榮曰·門外極可觀·君奈何獨塊處此·榮不應·就榻強挽之·榮起坐·澄念誦天蓬咒·才數句·兩人即趨出·禹功之僕·取湯於中堂·覺如人疾步相躡者·心頗動·望堂上燈光·方敢回顧·乃白鵝一群·叱之即沒·長文之小史·從堂後中間過·遇婦人高髻盛服·憑闌坐·不見其足·稍前視之·已失矣·持更者言·每夕必見此鬼往來雲·東橋土地

李允升者·以進士登第·用樞密使汪明遠薦·得上元令·歸宜興待闕·夢縣之東橋土地遣人來迎·雲當作交代·允升辭以當赴官·不願為此職·土偶甚怒·曰·汝且去上元滿一任·允升到官二年·以事去·竟用贓罪·徙嶺南·
閻羅王

林衡·字平甫·平生仕宦·以剛猛疾惡自任·嘗知秀州·年過八十·乃以薦被召·除直敷文閣·既而言者以為不當得罷歸·歸而病·病且革·見吏抱案牘來·紙尾大書閻羅王林·請衡花書名·衡覺以語其家·前此二十年·蓋嘗夢當為此職·秘不敢言·今其不免矣·家人憂之·少日遂卒·卒之夕·秀州精嚴寺僧十餘人·同夢出南門迎閻羅王·車中坐者·儼然林君也·衡居於秀之南門外·時幹道二年·二事方務德說·

文氏女

幹道三年四月·永州文氏女及笄·已定昏將嫁·前兩夕·夢黃衣人領至官曹·判官綠袍戴幘·迎謂曰·且得汝來·此間錯了公事·起大獄十五六年·累人不少·汝且歸·明日復來·遂覺·以白父母·殊不曉其言·次夕·又夢至殿下·王者據案坐·判官抱文牘以上·王判雲·改正·即有人持湯一杯·於廷下飲之·極腥惡·出門而寤·則化為男子矣·父母驚遣報婿·婿家以為本非女子·特以詐給人·投牒訟於州·案驗得實·乃已·其語音態度·猶與女不異·但改衣男服爾·婿家復欲妻之以女雲·

神乞簾

永州譙門相對有小廟·廟神見夢於錄事參軍何生·曰·吾一方土地神耳·非王侯也·郡守每出入·必徑祠下·我輒趨避之·殊不自安·就君乞一簾蔽我·如其言·明日夢來謝·化州守何休說·錄事之子也·

南嶽判官